

Хөдөлмөр, нийгмийн хамгааллын
сайдын ... оны ... сарын ... өдрийн ...
тоот тушаалын ... хавсралт

ЗАЛУУЧУУДЫН САЙН ДУРЫН АЖЛЫГ БҮРТГЭХ, БАТАЛГААЖУУЛАХ ЖУРАМ

Нэг. Нийтлэг үндэслэл

1.1 Энэхүү журмаар Залуучуудын хөгжлийг дэмжих тухай хуулийн 6 дугаар зүйлийн 6.1.3, 6.1.4, 13 дугаар зүйлийн 13.1.3, 15 дугаар зүйлийн 5.2 дахь хэсэгт заасан хүмүүнлэгийн болон сайн дурын ажилд залуучуудыг хамруулах, бүртгэх, оролцоог баталгаажуулах, ажлын туршлагад тооцох үйл ажиллагааг зохицуулна.

1.2 Энэхүү журмын 1.1 дэх хэсэгт заасан үйл ажиллагааг зохицуулахдаа Залуучуудын хөгжлийг дэмжих тухай хууль, Гамшгаас хамгаалах тухай хууль, Галын аюулгүй байдлын тухай хууль, Донорын тухай хууль, Гамшгаас хамгаалах сайн дурын ажиллагааны нийтлэг журам (2016) болон бусад хууль тогтоомжийг баримтална.

Хоёр. Сайн дурын ажилд хамруулах, бүртгэх, баталгаажуулахад баримтлах зарчим

2.1 Залуучуудыг сайн дурын ажилд хамруулахад дараах зарчмыг баримтална:

- 2.1.1 сайн дурын, хууль ёсны тэгш эрхийн зарчимд нийцсэн байна;
- 2.1.2 нас, хүйс, нийгмийн гарал, байдал, хөрөнгө чинээ, үзэл бодол, боловсролын хувьд ялгаварлан гадуурхахгүй;
- 2.1.3 хүний эрх, эрх чөлөөг эрхэмлэж, хүнлэг, энэрэнгүй байна;
- 2.1.4 хувь хүн, байгууллагын нууцыг чандална;
- 2.1.5 эв нэгдэл, хамтын ажиллагаанд суурилсан;
- 2.1.6 аюулгүй байдлыг хангасан;
- 2.1.7 ашгийн төлөө бус, арилжааны шинж чанар агуулаагүй;
- 2.1.8 ил тод, нээлттэй;
- 2.1.9 архи, согтууруулах ундаа, тамхи зэрэг хорт буруу зуршлыг сурталчлахгүй;
- 2.1.10 уян хатан цагийн хуваарьтай байна.

Гурав. Сайн дурын ажлын чиглэл

3.1 Залуучуудын сайн дурын ажил нь дараах үндсэн чиглэлтэй байна:

- 3.1.1 орчны тохижилт, ногоон байгууламжийг нэмэгдүүлэх;
- 3.1.2 зорилтот бүлгийн залуучууд¹-ын нийгмийн оролцоог дэмжих;
- 3.1.3 Залуучуудын хөгжлийг дэмжих тухай хуулийн 4 дүгээр зүйлийн 4.1.1 дэх хэсэгт заасан залуучууд нийгэм, сэтгэл зүйн дэмжлэг үзүүлэх, тэдний оролцоог дээшлүүлэх;
- 3.1.4 залуучуудад нийтийн соёлыг түгээн дэлгэрүүлэх, амьдрах ухааны чадварыг олгох, хариуцлагатай иргэн болж төлөвшихөд дэмжлэг үзүүлэх;
- 3.1.5 хараа хяналтгүй хүүхэд, залуучуудыг нийгэмшүүлэх, ахмад настан, хөгжлийн бэрхшээлтэй иргэний асрамж, халамжийн байгууллагуудыг дэмжих;
- 3.1.6 эрх ашиг нь зөрчигдсэн залуучуудын эрх ашгийг хамгаалах;
- 3.1.7 гамшгаас хамгаалах, урьдчилан сэргийлэх;
- 3.1.8 нийгмийн эрүүл мэндийг дэмжих, эрүүл зан үйл, дадал хэвшил төлөвшүүлэх;
- 3.1.9 нийгмийн хэв журмыг сахиулах;
- 3.1.10 нийтийн боловсролыг дээшлүүлэх;
- 3.1.11 замын хөдөлгөөний аюулгүй байдлыг сайжруулах;
- 3.1.12 бусад.

Дөрөв. Сайн дурын ажилтны эрх, үүрэг, хориглох зүйл

4.1 Сайн дурын ажилтан нь дараах эрх эдэлнэ:

- 4.1.1 сайн дурын ажлын чиглэлээ сонгох;
- 4.1.2 сайн дурын ажил гүйцэтгэхэд шаардагдах мэдээ, мэдээллийг холбогдох төрийн байгууллага, албан тушаалтнаас авах;
- 4.1.3 аюулгүй байдал, хувийн мэдээллээ хамгаалуулах;
- 4.1.4 сайн дурын ажил гүйцэтгэсэн тухай тодорхойлолтыг авах.

4.2 Сайн дурын ажилтан дараах үүрэг хүлээнэ:

- 4.2.1 бодит үнэн мэдээллийг нотлох баримтад тулгуурлан олон нийтэд түгээх;
- 4.2.2 хөдөлмөрийн эрүүл ахуй, аюулгүй байдлын дүрэм, журмыг сахиж;
- 4.2.3 өөрийн болон бусдын аюулгүй байдлыг хангах, бусдад туслах;
- 4.2.4 холбогдох байгууллага, албан тушаалтанд ажлаа тайлагнах;
- 4.2.5 хувь хүний болон нийгмийн ёс зүйн хэм хэмжээг сахиж.

¹ Залуучуудын хөгжлийг дэмжих тухай хуулийн 4 дүгээр зүйлийн 4.1.1 дэх хэсэгт заасныг үндэслэнэ.

4.3 Сайн дурын ажилтан дараах зүйлийг хориглоно:

- 4.3.1 бусдыг хүсээгүй байхад тусламж, дэмжлэг үзүүлэх;
- 4.3.2 улс төр, шашны эсвэл шашингүйн үзлийг сурталчлах, хуулиар хориглосон аливаа асуудлаар ухуулга, сурталчилгаа, нөлөөллийн ажил хийх;
- 4.3.3 мэдээ мэдээллийг хувийн зорилгоор ашиглах, завших, хувь хүний мэдээллийг зөвшөөрөлгүйгээр бусдад дамжуулах, олон нийтэд түгээх;
- 4.3.4 хувийн ашиг сонирхлын зөрчил гаргах, сайн дурын үйл ажиллагаанаас олсон орлого, хандивыг шамшигдуулах;
- 4.3.5 архи, тамхи, согтууруулах ундаа, сэтгэцэд нөлөөлөх эм, бэлдмэл хэрэглэх, хадгалах, сурталчлах, бусдад санал болгох, дамжуулах;
- 4.3.6 хүчирхийллийн төрлүүдийг үйлдэх, сурталчлах, садар самуунд бусдыг уруу татах, мэдээллийг нуун дарагдуулах;
- 4.3.7 үндэслэлгүй, нотолгоогүй мэдээллийг олон нийт, нийгэмд санаатайгаар түгээх, олон нийтийг төөрөгдүүлэх, турхирах.

Тав. Сайн дурын ажлын бүртгэл, зохион байгуулалт, баталгаажуулалт

5.1 Залуучуудын сайн дурын ажлын бүртгэл, зохион байгуулалт, сайн дурын ажилтны үүрэг, хориглох зүйлийн хэрэгжилтэд хяналт тавих, баталгаажуулалтыг залуучуудын асуудал эрхэлсэн төрийн захиргааны байгууллага хариуцна.

5.2 Залуучуудын сайн дурын ажил хийх хүсэлтийг бүртгэх маягтыг энэхүү журмын 1 дүгээр хавсралтаар батална.

5.3 Сайн дурын ажил гүйцэтгэх хүсэлтэй залуучууд тухайн орон нутгийн Залуучуудын хөгжлийн төвд бүртгүүлнэ.

5.4 Сайн дурын ажил гүйцэтгэх хүсэлтийг орон нутгийн Залуучуудын хөгжлийн төв сайн дурын ажил гүйцэтгүүлэх хүсэл, сонирхол бүхий талд холбон зуучилна.

5.5 Сайн дурын ажил гүйцэтгэсэн тухай тайланд тухайн ажлын зорилго, ач холбогдол, хугацаа, үр дүнг гэрэл зургаар баталгаажуулна. Хандив, тусламж авсан бол зарцуулалтын тайланг баримтын хамт хавсаргана.

5.6 Энэ журмын 3.1 дэх хэсэгт заасан чиглэлээр гүйцэтгэсэн сайн дурын ажлын явц, үр дүнг тухайн орон нутгийн Залуучуудын хөгжлийн төвийн саналыг үндэслэн залуучуудын асуудал эрхэлсэн төрийн захиргааны байгууллагын дарга үнэлнэ.

5.7 Үнэлгээ хийгдсэн сайн дурын ажлын мэдээллийг “Залуучуудын мэдээллийн нэгдсэн сан”-д байршуулж баталгаажуулна.

Зургаа. Сайн дурын ажил гүйцэтгэсэн тухай лавлагаа авах

6.1 Сайн дурын ажил гүйцэтгэсэн тухай лавлагаа нь иргэний хувийн мэдээлэл болон гүйцэтгэсэн ажлын жагсаалт, гүйцэтгэлийн түвшин, үр дүн, сайн дурын ажил хийсэн хугацаа зэрэг мэдээлэл бүхий маягтаар хийгдэнэ.

6.2 Сайн дурын ажлын лавлагааны маягыг энэхүү журмын 2 дугаар хавсралтаар батална.

6.3 Сайн дурын ажлын лавлагааг Монгол Улсад мөрдөгдөх хууль тогтоомжид нийцсэн үнэт цаас дээр хэвлэх бөгөөд үнэт цаасны өртгийг лавлагаа хүсэгч төлнө.

6.4 Сайн дурын ажлаа бүртгүүлж, баталгаажуулсан иргэд лавлагаа авахдаа орон нутгийн залуучуудын асуудал эрхэлсэн төрийн байгууллагад хүсэлт гаргана.

Долоо. Сайн дурын ажилтанд үзүүлэх дэмжлэг

7.1 Сайн дурын ажил гүйцэтгэж буй залуучуудыг залуучуудын асуудал эрхэлсэн төрийн бүх шатны байгууллагууд мэргэжил, арга зүйгээр дэмжин ажиллана.

7.2 Тухайн сайн дурын ажлын зорилго, явц, үр дүнг олон нийтэд сурталчлан түгээх, дэлгэрүүлэх чиг үүргийг төрийн холбогдох байгууллага, албан тушаалтан давхар хариуцаж, залуучуудын асуудал эрхэлсэн төрийн захиргааны байгууллагатай хамтарч ажиллана.

7.3 Сайн дурын ажлын цар хүрээ, гүйцэтгэл, нийгэмд үзүүлэх үр ашиг, нөлөө, гүйцэтгэлийг үнэлэн төрийн дээд одон, медаль, салбарын болон бусад шагнал урамшуулалд тодорхойлох үүргийг залуучуудын асуудал эрхэлсэн бүх шатны төрийн байгууллага хариуцна.

7.4 Сайн дурын ажил гүйцэтгэх явцдаа эрх ашиг нь зөрчигдсөн тохиолдолд түүний эрх ашгийг тухайн орон нутгийн залуучуудын асуудал эрхэлсэн төрийн байгууллага хамгаалах бөгөөд холбогдох байгууллага, албан тушаалтанд холбон зуучилна.

-oOo-